

## HITZ BITAN

MANIFESTAZIOA. Ehunka lagun elkartu ziren

Iraken aurkako erasoak  
ekiditeko mobilizaziorako deia  
egin dute Baionako karriketan

Aitor Renteria | BAIONA

Irakeko gerra gelditzea eskatu zuten atzo 200 manifestari inguruk Baionako karriketan. Irakeko gerra ekiditeko Europako Estatuak presioa egin behar zaiela adierazi zuten Gertari Aski taldeko ordezkariak. Oro har, 20 partidu eta sindikatuk egin zuten bat manifestaldiaren deialdiarekin, bertzeak bertze, AB, LCR, CNT, Batasuna, Segi, Askatasuna eta SUD sindikatuak.

Manifestazioa Herriko Etxetik abiatu zen. *Petrolioarengatik gerrarik ez* zioen banderaxkaren gibelean, manifestariak Baiona Zaharreko karriketan ibili ziren. *Bush, Sharon, Putin hiltzaile* eta *Gerrarik ez petrolioarengatik* izan

ziren lelo nagusiak. Lehen mintzaldia merkatuko plazan egin zen, manifestazioaren erdi aldera. «Irakeko gerra ekiditeko mobilizaziorako deia helarazi nahi diogu jendarteari», adierazi zuen Irene Ithursarrik Gerrari Aski taldearen izenean. «Bush Iraken gaineko erasoaldia prestatzen dabil, eta bitartean ELF-Total-Finalko ordezkariak enbaxadetan pastela nola banatu aztertzen ari dira», gaineratu zuen.

Mintzaldiaren ondoren manifestazioa Baiona Ttipira abiatu zen, eta San Andre plazan bururatu zen. Dagoeneko, Euskal Herrian ez ezik, Frantzia mailan ere mobilizazioak iragarri ditu Gerrari Aski taldeak abenduaren 14rako.



RAUL BOGAJO / ARGAZKI PRESS

Euskaltzaleak, gizarte-eragileak eta udal ordezkariak, atzo, Aguraingo udaletxean.

## EUSKARA

## Bai Euskarari akordioa garatzeko akordioa lortu dute Agurainen

Bai Euskarari akordioa garatzeko plana hitzartu dute Aguraingo Udalak, euskalgintzak eta hainbat gizarte-eragilek. Aguraingo udal batzarrak aho batez onartu zuen egitasmoaren beharra. AEK, Baietz, ikastola eta institutua atxiki dira

euskararen mundutik. Gizartetik, berriz, Tibbet & Britten enpresak, Vital Kutzak eta Manu Yanke mendi elkarteak egin dute bat. Lehenik euskararen egoerari buruzko diagnosis egingo dute, ondoren neurri zehatzak abiatzeko.

## LAPURRETAK

Gipuzkoan ustez lapurreta  
eta sexu eraso ugari egin  
dituena atxilotu duela esan  
du Ertzaintzak

Ertzaintzak jakinarazi duenez, atxilotu egin du Gipuzkoan 1997az geroztik ustez lapurreta eta sexu eraso ugari egin dituen gizonetako bat. Batez ere Donostialdea, Oarsoaldea eta Bidasoaldean egin dituela delituak adierazi zuen Ertzaintzak atzo. R.G.T. 27 urteko gazteak dantzalekuen inguruan egiten zituen erasoak, Ertzaintzak esan duenez. 14 eta 30 urte bitarteko gizonetakoak izaten ziren normalean bere biktimak. Lapurtu eta sexu ukituak egiten zizkien biktimei. Horrelako asko egin ostean, joan den asteburuan Hondarribian atxilotu zuen Ertzaintzak. Gazte bati oinetakoak lapurtu berri zizkion. Atxilotua Martutenen preso sartu zuten joan den asteartean, EA-Eko Polizia Autonomikoak jakinarazi duenez.

## KONTSUMOIA

Gehiegi ez kontsumitzeko eskatu du Bilbon  
Hirugarren Mundua eta Bakeak

Hemen eta Munduan Gobernu Kanpoko Erakundeko hainbat lagun Bilboko El Corte Ingles merkataritza gun handiaren aurrean izan ziren atzo, dendara sartzen zirenei gehiegizko kontsumoak eragiten dituen arazoak gogoratzeko. Besteak beste, munduak eskaintzen dituen baliabideak baino gehiago kontsumitzen dugula azpimarratu zuen Hemen eta Munduan-ek.

## DROGA TRAFIKOA

Guardia Zibilak bederatzi lagun atxilotu ditu Nafarroan  
droga trafikatzeari

Dantzalekuetan-eta droga banatzen aritzen ziren bederatzi lagun atxilotu ditu Nafarroan Guardia Zibilak. Halaber, hainbat drogetako —haxixa, kokaina, speed-a, marihuana...— 40.000 dosi ere atzeman ditu. Guardia Zibilak adierazi duenez, joan den abuztuaren 27an hasi zen operazioa.

## OSASUNA

## 78.000 pertsonak izan dute gripea aurten EAEn

Urriaren 19a arte, Araban, Bizkaian eta Gipuzkoan 78.000 pertsonak izan dutela gripea jakinarazi zuen atzo Eusko Jaurlaritzako Osasun Sailak. Astanafarreria izan dutenak, berriz, 7.300 izan dira; 406 lagunek izan dute tuberkulosia eta 86k legionella, Jaurlaritzak emandako datuen arabera.



GORIKA AVESTARAN / EFE

## HOMOSEXUALITATEA

Homosexualen arteko lehenengo ezkontza egin da  
Gasteizko Udaletxean

Peio Lopez de Munain PSE-EEko Gasteizko Udaleko zinegotziak ezkondu zuen atzo Arabako hiriburuan ezkondu den lehenengo gayen bikotea. Ezkontzak gainerakoen ezaugarriak izan zituen, baina ez du balio juridikorik izango. 48 urteko bi gizonetako ezkondu ondoren, Agur Jaunak abestuz bukatu zen ospakizuna. Lopez de Munainek eskatu zuen horrelako ezkontzei balio juridikoa eman diezaietela.

**Hernaniko Udala**

Hernaniko 32.6 (Ereñotzu) Arian, egitekoak diren kooperatiba jaurpideko babes ofizialeko 12 etxebizitza esleitzeko oinarriak,

a) Erreklamazioa aurkezteko epea: azken argitalpenetik kontatzen hasita 15 egun baliagarriko epean.

b) Eskararik aurkezteko epea: azken argitalpenetik kontatzen hasita 21 egun baliagarriko epean.

**Informazioa:** Astelehen eta ostiraletan Herrian, Hirigintza eta Ingurumen arloko bulegoan (4. solairua).

**Eskararak:** udaleko erregistro orokorrean.

Hernanin, 2002ko azaroaren 22an. ALKATEA.

IDAZKUNTZA ETA ITZULPENGINTZA  
ikastaroa

- **Ikastaroaren iraupena:** 2003ko urtarrilaren 9tik 2003ko ekainaren 19ra. 140 ordu.
  - **Ordutegia:** Astearte eta ostegunetan, 16:30-19:45
  - **Izen-ematea:** 2002ko azaroaren 29ra arte.
  - **Informazioa eta izen-ematea:** [www.ueu.org](http://www.ueu.org)
- UEUko Ikastetxe Nagusia. Otaola hiribidea, 1. 20600 Eibar. Telf. 943 82 14 26
- e-posta: [markeskoa@ueu.org](mailto:markeskoa@ueu.org)

Antolatzailea:



Udako Euskal Unibertsitatea

Emaila:

